

# Dumbraziun da lufs-tscherver

Il cantun ha iniziàu in grond project da monitoring

HANS HUONDER/FMR


■ En cooperaziun culla Kora organischa igl Uffeci per catscha e pesca dil Grischun questa primavera in monitoring davart il luf-tscherver. La finamira ei d'eruir cons lufs-tscherver ch'ei dat el territori dalla Surselva entochen en Tumliasca. Sco quei ch'igl uffeci ha informau quels dis las vischnauncas e las sezziuns da catschadurs dil perimenter dil monitoring che pertucca la Surselva, Stussavgia, la Muntogna ed il Plaun senza Domat, ei il project lantschus. Ensem cul Post da coordinaziun per ecologia d'animals da rapina e management dalla selvschina (Kora) duei vegnir recaltgaur novas enconuschientschas davart la derasaziun dil luf-tscherver. «La finamira dil project cun fototraplas ei da recaltgar datas davart il territori dils singuls lufs-tscherver, il diember da quels e cons che sesanflan sin ina surfatscha specifica», scriva il cau digl uffeci, Adrian Arquint ella circulara.

## Biaras cameras

Tut en tut vegn installau 77 fototraplas tenor in raster fixau e cun risguard dallas zonas da ruaus. Las cameras ein vegnidadas montadas dils 10 entochen ils 18 da fevrer 2021. Ellas ein en funcziun ils proxims dus meins e vegnan allura puspei demontadas ils 19 d'avrel 2021. Grazia a lur muster dil peil sa mintga singul luf-tscherver vegnir indentificaus sin fundament dallas fotografias. Cun agid dallas datas recaltgadas cun quei monitoring vegn ei ad esser pusseivel d'eruir la grondezia dalla populaziun ed aschia da menar ina statistica cunscienziosa.

## Tablas d'informaziun

Sco quei ch'igl uffeci scriva, vegnan era auters animals da rapina gronds ni autras specias dalla selvaschina sco era animals da casa fotografai en quei connex. Tschafai dallas cameras vegnan denton era carstgauns ch'ei sin viadi en quels territoris. «Quellas fotos vegnan stizzadas immediat», puntuescha Adrian Arquint. En mintga liug, sco era sin vias che meinan en loghens cun fototraplas ei vegniu montau tablas d'informaziun. Quellas dattan sclariment davart il project da monitoring. La stad 2021 quenta igl Uffeci per catscha e pesca dil cantun Grischun d'esser en possess dils resultats davart quei project, denter auter secapescha cons animals che vivan els differents perimeters.



La carta muossa ils secturs che vegnan survegliati ils proxims dus meins cun fototraplas.

MAD

## Il luf-tscherver ei sederasaus

Il luf-tscherver ei returnaus el Grischun, respectiv en Surselva, avon biebeen 20 onns. Ils 12 da matg 1999 ein las restonzas d'in ansiel-camutsch vegnidadas anfladas ella Val Cristallina e las examinaziuns da quellas han allura mussau ch'el era staus l'unfrenda d'in luf-tscherver. Quei ei stau igl emprem clar mussament dil return da quei animal da rapina sisum la Surselva. Cons lufs-tscherver che vivan il mument el Grischun ei buca dil tut clar. Ils davos onns ha ei dau repetidamein observaziuns da singuls, mo era da famiglias da lufs-tscherver. Igl atun 2013 eis ei reussiu alla survegionza da catscha da fotografar cun ina fototrapla per l'emprema ga ina famiglia da lufs-tscherver, numnadamein ina femella cun dus pigns el territori da Sumvitg/Clavadi.

Igl ei stau l'emprema ga suenter 150 onns ch'ins ha constatau ina reproducziun da lufs-tscherver el cantun Grischun. Il territori principal dil luf-tscherver el Grischun ei da sum la Surselva entochen la Tumliasca.



Il luf-tscherver ei turnaus en Surselva avon biebeen 20 onns.

FOTO GABI EUGSTER/SOMEDIA

## TIR

# Distincziun per la giuvna tiradura Annina Tomaschett

(fmr/hh) Annina Tomaschett da Trun ha obteniu il premi dalla megliera tiradura giuvna grischuna digl onn 2020. Ella ha survegniu la distincziun surdada per la secunda ga ella categoria sut 21 onns. Annina Tomaschett ha sittau ils davos onns regularmeins fetg buns resultats e ha aschia era saviu separicipar a concurrenzias internaziunalas. Ella appartegn al cader nazional da buis cun 50 meters. Igl avrel entscheiva ella culla scola da recruta dil sport d'elita a Magglingen. Tiradur grischun dall'elita digl onn 2020 daventa Lars Färber da Favugn, medemamein in tiradur cun caliber pign silla distanza da 50 meters. Era el appartegn al cader nazional. Per Lars Färber ei quei gia il secund tetel sco tiradur grischun suenter 2005. Quei premi ei vegniu surdaus gia per la 31 avla ga dall'Associaziun dil tir da sport dil Grischun. Muort la pandemia dil coronavirus eis ei buca stau pusseivel da far ina surdada publica dils premis. Ils dus undrai han tonaton obteniu las cristallas sco simbol dil premi.



Honor per la tiradura giuvna Annina Tomaschett da Trun.

MAD

reclama

